

SDILLARIANDU

- Oh... senti, mamma, senti comu trona...-
- Santa Bàrvara mia martirizzata,
Datimi ajutu vui 'ntra sta jornàta...
Ccittu, giojuzza, sta 'nu morzu bbona! –

- Mamma, mi pari ca nd'aju lu focu
Supra a la frunti, mèntimi la manu
E fammi 'na carizza chianu, chianu
E ccàcciami sti brasi a ppocu a ppocu...

Ah, fora chiovi, mamma, fora chiovi...
Guarda se l'acqua fa li vovolàci... -
- Picciridùzza mia , dùnati paci.
Quètati e dormi senza mu ti movi!...

- Mamma non senti? Mi pari 'nu lagnu...
'nu 'ngùsciu...statti, non t'alluntanàri,
guarda cu veni...su ttanti cotràri...
Chi longapìa! Mi fannu mu mi spagnu !...

- Santissima Maria di la Catìna,
vui chi ffùstivu mamma comu mia,
fàtimi nommu viju st'agonìa
chi mmi pèrcia lu cori comu spina!

Ca pemmu campu senza stu trisòru,
sarìa comu 'na pècura sbandata,
senza campana, sula e scunzulàta:
Santa Madonna , fàtimi mu Moru !

Francesco Laruffa

www.associazionelaruffa.org